

l'audientia in palazzo, perchè in la sala di l'audientia si fa per Raphael Penzim il relogio.

Vene in Collegio uno orator di la comunità di Ragusi vestito di veluto negro nominato Georgio qual intrato sentò apresso il Serenissimo, et presentate le lectere di credenza expose di gran danni fatti de li a soi subditi per le nostre galie, pregando la Signoria et questo eccellentissimo Slado si voi far provision etc. Il Serenissimo li usò grate parole dicendo che si faria provision non si facesse danno etc. Si lamentò di sier Zuan Zustignan soracomito e dil Taiapiera capitano di la barza.

Fo leto una parte di far capitano al Golfo per 4 man di eletion, et per scurtinio in gran Conseio et armar 4 galie in questa terra aziò le zurme non vadino via.

Vene l'orator dil duca di Mantoa per cose particular: di certo tristo qual in questa guerra pasada ha fato molti mali, et era con l'imperator. È sta per li avogadori extraordinari retenuto contra li capitoli etc. che vol si perdoni a tutti.

Vene l'orator dil duca di Urbin sollicitando li danari dia aver el suo signor, ch'è zerca ducati 40 milia, et che vol venir questo carlevar in questa terra, sì per conseiar la fortification di Verona come per parlar di fortificar le terre di Puia etc. Et il Serenissimo li disse quanto a li danari si meteria il primo Pregadi tanxe, et se li daria ducati 20 milia, et che soa excellentia non si fatichi per questo che si provederà certissimo.

Di Cival di Friul fo lettere di sier Marco Grimani proveditor, di 11. Come ha hauto aviso, per persona degna di fede di Gorizia qual referisse haver inteso da uno venuto da Viena, donde partì a l'ultimo dil passato: il re Ferdinando era a Linz per causa di la dieta, havea mandati al Vayvoda li ambasciatori, uno di qual è domino Sigismondo Letystainer, e questo per tratar accordo, qual molto sperano di conseguire. Dice ancora che in Viena tuttavia si fatica, et che ivi e in Neustoth la peste va perseguitando.

164• Da poi disnar fo Conseio di X con la Zonta. Et prima nel semplice, essendo sta dominica passata retenuto domino Piero de Nordis cavalier ciprioto di anni 62, qual era stravestito et havia arme, unde per la parte li Cai di X non poteno liberar, et è stato sin hora ozi mo fu preso rilasarlo con questo pagasse 100 lire a li ufficiali. Item, fu modificato la parte di le maschere si troverà de coetero con arme, videlicet quelli hanno da pagar

pagino lire et non havendo di pagar stii un mexe in prexon; la qual si pubblicherà.

Item preseno con la Zonta dar 4 *postprandii* a la Quarantia Criminal questo mexe, per expedir il caso di Santo Lopes, che hora si tratta et si mena.

Item, fono sopra la proposta fata in Colegio per lo episcopo di Verona per nome dil papa, et alcuni voleano risponderli per questo Conseio, altri volseno, come è il dover, la materia vengi in Pregadi, e su questo fo gran disputation *tandem* preso risponderli per Pregadi.

Prima fono in do scurtini fati li 15 al Collegio di le aque, apresso li do iusta la parte, et 6 che mancavano, sichè numero fono electi tuti con titolo di Conseio di X. Et li 6 sono in luogo de sier Polo Nani, sier Hironimo da chà da Pexaro, è intrati consieri di sora, sier Marco Dandolo dottor cavalier, sier Alvise Gradenigo rimasti savii sopra li statuti, de sier Marco Loredan va podestà a Verona et Et quelli rimaseno sarano notadi qui sotto, et *etiam* li do presidenti fati.

In questo zorno poi disnar, reduto le do Quarantie criminal et civil vechia, fato comandar sier Domenego Gritti qu. sier Francesco padre di sier Francesco Gritti pagador *olim* in campo incarzerato, et reduto, sier Alvise Badoer avogador extraordinario parloe dicendo haver voluto dal dito il libro et le bolete, el qual non ge l'ha volute dar, però vol meter pena le dagi.

Li rispose domino Francesco Fileti dottor avvocato dicendo è sta spazà di Collegio una volta, et non si pol alterar il processo se i non taia quel spazo, poi hanno il zornal etc. Li rispose sier Stefano Tiepolo avogador *ut supra*, al qual rispose sier Bastian Venier avvocato, et poi tutti 3 essi avogadori extraordinari che'l ditto sier Domenego Gritti in termine di zorni 4 dovesse haver a presentar al loco il libro et bollette *ut supra* in pena di ducati 200 *ut in parte*. Ave 47 di sì, 17 di no, 11 non sinceri et fu preso.

Item, da poi introno sopra expedir uno nostro contestabile, nominato Lorenzo Corteregia di nation , qual havia provision ducati per paga, et in questa guerra ha auto 200 fanti et ha ingannato grossamente la Signoria dil numero di fanti dovea tenir, et per avanti fu preso di retenir et fo chiamà, il qual non si apresentò et absente è sta condannato. Leto le scritture parlò sier Alvise Badoer avogador predito, et preso che'l sia privo di la provision, bandito di terre et lochi etc. con taia lire . . . et essendo preso sia apicato per la gola,